



REPUBLIKA E KOSOVËS / REPUBLIKA KOSOVA

GJYKATA THEMELORE PEJË

---

Numri i lëndës: 2021:042314

Datë: 29.04.2023

Numri i dokumentit: 04236667

NË EMËR TË POPULLIT

P.nr.203/2021

GJYKATA THEMELORE NË PEJË- Departamenti i Përgjithshëm-Divizioni Penal, gjyqtari i vetëm gjykues Leon Përlaska, në çështjen penale kundër të pandehurit R. H. , për shkak të veprës penale Kanosja nga neni 181 par.1 të KPRK-së, sipas aktakuzës së Prokurorisë Themelore në Pejë - Departamenti i Përgjithshëm PP.II.nr.460/2021 të datës 04.03.2021 dhe kërkesës për dhënien e urdhrit ndëshkimor, jashtë seancës, me datë 28.04.2023, mori këtë:

A K T G J Y K I M

PRANOHET kërkesa e Prokurorisë Themelore në Pejë-Departamenti i Përgjithshëm, PP.II.nr.460/2021 të datës 04.03.2021, andaj gjykata konform dispozitës së nenit 495 të KPPRK-së, jep:

URDHËR NDËSHKIMOR

I pandehuri:

**R. H.** , i lindur më datë .... në Pejë ku edhe tani jeton, nga i ati Xh. dhe nëna A., mbiemri i vajzërisë së nënës F. i martuar, baba i 8 fëmijëve, i identifikuar në bazë të letërnjoftimit me numër personal ....., rom, Shtetas i Republikës së Kosovës.

## ËSHTË FAJTOR

### SEPSE:

Me dt. 21.02.2021, rreth orës 18:00, në rr. "N. T.", saktësisht në Spitalin Rajonal në Pejë, në dhomën nr. 10, seriozisht kanos te dëmtuarin F. T. se do ti shkaktoj ndonjë të keqe me qëllim te frikësimit dhe shkaktimit te ankthit, në atë mënyrë që, natën kritike i dëmtuari përderisa ndodhej i shtrirë në repartin e kirurgjisë, në spitalin e sipërshënuar, aty vjen i pandehuri i cili fillimisht i kishte ofruar ndihmë financiare të dëmtuarit meqenëse ky i fundit dhe djali i tij kishin pas një rast paraprak, me «rast fillimisht në mes tyre fillon një zënkë verbale e më pas i pandehuri iu kishte drejtuar me fjalët kanosëse se: "kam me ti pre veshët" si dhe vërsulet në drejtim të te njëjtit, por aty ndërhyjnë dëshmitari S. Z. duke evituar kontaktin.

-Me këtë ka kryer veprën penale Kanosja nga neni 181 par.1 të Kodit Penal të Republikës së Kosovës (06/L-074).

Andaj, gjykata konform dispozitave të neneve 38, 39, 40, 43,61, dhe 69 të KPRK-së, si dhe bazuar në nenet 365, 493, 495 të KPPK-së, të pandehurit i shqipton:

## DËNIM ME GJOBË

- I. Në lartësi prej 100 € (njëqind) Euro, të cilin dënim është i obliguar që ta paguaj në afat prej 3 muajsh prej ditës së marrjes së formës së prerë të këtij aktgjykimi.
- II. Në rast qe i pandehuri nuk dëshiron apo nuk mund ta paguaj dënimin me gjobë, gjykata mund ta zëvendësoj dënimin me gjobë më dënim me burgim, ku një ditë burgim do të llogaritet me njëzet (20) euro gjobë.
- III. OBLIGOHET i pandehuri që në emër të paushallit gjyqësor të paguaj shumën prej 20 € (njëzet) euro dhe në emër të fondit për kompensimin e viktimave të krimit shumën prej 20 € (njëzet) euro, të gjitha këto në afat prej 15 ditësh prej ditës së marrjes së formës së prerë të këtij aktgjykimi nën kërcënimin e përmbarimit me detyrim.

## ARSYETIM

Prokuroria Themelore në Pejë-Departamenti i Përgjithshëm ka ngritur aktakuzën PP.II.nr.460/2021 të datës 04.03.2021, kundër të pandehurit R. H. , për shkak të veprës penale Kanosja nga neni 181 par.1 të KPRK-së. Së bashku me aktakuzën prokuroria ka dorëzuar kërkesën me të cilën ka kërkuar që të pandehurit t'i shqiptohet urdhri ndëshkimor- dënim me gjobë.

I pandehuri është i akuzuar për veprën penale Kanosja nga neni 181 par.1 i Kodit Penal të Republikës së Kosovës (06/L-074), që e ka këtë përshkrim: “Kushdo që seriozisht e kanos personin tjetër me fjalë, vepra apo gjeste se do t'i shkaktoj ndonjë të keqe me qëllim të frikësimit ose të shkakimit të ankthit te personi i tillë, dënohet me gjobë ose me burgim deri në gjashtë (6) muaj.

Me rastin e shqyrtimit paraprak të çështjes, gjykata erdhi në përfundim se janë plotësuar kushtet ligjore nga neni 493 par.1 dhe 495 par.1 dhe 2 të KPPK-së, ashtu që vendosi ta pranoj kërkesën për dhënien e urdhrit ndëshkimor si në dispozitiv të këtij aktgjykimi.

Gjykata konsideron se provat e bashkangjitura në shkresat e lëndës si: raporti i policit hetues E.S. i dt. 22.02.2021, deklarata e të dëmtuarit F. T.e dhënë në Spitalin Rajonal në Pejë me dt. 22.02.2021, deklarata e dëshmitarit S. Z. e dhënë në stacionin policor me dt. 22.02.2021, deklarata e të pandehurit R. H. e dhënë në stacionin policor me dt. 22.02.2021, informacionet mbi të kaluarën kriminale e nxjerrë nga data-baza policore për të pandehurin R. H. , janë prova që ofrojnë bazë të mjaftueshme për dhënien e urdhrit ndëshkimor dhe se i pandehuri ka kryer veprën penale Kanosja nga neni 181 par.1 të Kodit Penal të Republikës së Kosovës (06/L-074).

Me rastin e caktimit të lartësisë së dënimit me gjobë, gjykata u mbështet në nenin 43 par.1 dhe 2, 69 dhe 70 të Kodit Penal të Republikës së Kosovës (06/L-074), ku nga provat e bashkangjitura lëndës dhe faktet e përshkruara si në aktakuzë gjykata erdhi në përfundim se dënimi me gjobë i shqiptuar si në dispozitiv të këtij aktgjykimi do të arrij qëllimin e dënimit siç parashihet në nenin 38 të KPPRK-së dhe se ky dënim do të parandaloj kryesin nga kryerja e veprave penale në të ardhmen, të bëjë rehabilitimin e tij, të parandalojë personat e tjerë nga kryerja e veprave penale të ngjashme dhe shprehë gjykimin shoqëror për veprën penale të kryer nga i pandehuri.

Vendimi mbi shpenzimet e procedurës penale për paushallin gjyqësor është marrë, në kuptim nenit 449 par.1 dhe par.2 nën paragrafi 2.6 dhe nenin 452 par.1 të KPPK-së.

Vendimi lidhur me taksën për kompensimin e viktimave të krimit, u mor në bazë të nenit 36 par.3 pika 1 të Ligjit 08/L-109, për kompensimin e viktimave të krimit.

Nga se u tha më lartë, në kuptim të neneve 364 dhe 495 të KPPRK-së u vendos si në dispozitiv të këtij aktgjykimi.

### GJYKATA THEMELORE NË PEJË

Departamenti i Përgjithshëm-Divizioni Penal

P.nr.203/2021, me datë 28.04.2023

Gjyqtari i vetëm gjykues

Leon Përlaska

### KËSHILLË JURIDIKE:

Kundër këtij aktgjykimi i pandehuri apo mbrojtësi i tij mund të paraqesin kundërshtim në afatin prej 8 ditësh, nga dita e pranimin të tij, në këtë gjykatë.

### Vërejtje:

Nëse nuk paraqitet kundërshtimi brenda afatit të lartshënuar, urdhri ndëshkimor merr formën e prerë dhe dënimi i shqiptuar të pandehurit ekzekutohet.